

**Uunga siunnersuut: Ilanniartut ineqarfii pillugit Inatsisartut Inatsisaata allanngortinnissaa pillugu Inatsisartut inatsisaat**  
 (Ilanniartitaanermut, Kultureqarnermut, Timersornermut Ilageeqarnermullu Naalakkersuisoq)

**Akissuteqaat**

(Ilanniartitaanermut, Kultureqarnermut, Timersornermut Ilageeqarnermullu Naalakkersuisoq)

**Aappassaaneerneqarnera**

Aallarniutigalugu Naalakkersuisut sinnerlugit Kultureqarnermut, Ilanniartitaanermut, Ilisimatusarnermut Ilageeqarnermullu ataatsimiititaliaq siunnersummiq peqqissaartumik suliaqarsimanerannik isumaliutissiissutaannillu qutsavigerusuppakka.

Ataatsimiititaliap isumaqatigiilluni siunnersuut akuersissutigineqartussatut inassutigigaa Naalakkersuisunit iluarismaarlugu paasivarput.

Naalakkersuisut allannguutissatut siunnersuutikkut ilinniagaqartut erninermut atatillugu sulinngiffeqartut, ilanniartut peqatigiiffiat Pitaaq ataatsimiititaliallu kaammattuutaat, ilanniartut ineqarfii pillugit inatsimmik allannguisoqartariaqarneranut atatillugu tusaaniarsimammatigit ataatsimiititaliap nuannaarutigaa.

Ilanniartunut ineqarfinnik naammattunik atugassaqarniarnerup ajornartorsiutaneranut atatillugu Naalakkersuisut ilanniartut ineqarfii pillugit immikkoortumut pilersaarummi 2019-imeersumi allannerat, Ilanniartut ineqarfeqarnerannut Immikkoortumut pilersaarut eqaatsumik allanngorartumik aaqqissuussaasoq ataatsimiititaliap maluginiarpa, Naalakkersuisullu kaammattorlugit inatsimmik allannguinerup kingunerisai ilanniartut ineqarfiini immikkoortumut pilersaarusiap suliarineqaqqinnerani atorneqassasut. Tamannalu tunuliaqataralugu ineriartorneq malinnaaffigiumallugu Naalakkersuisut kaammattuut tusaatissatut tiguaat.

Naalakkersuisut ilanniartut ineqarfissaannik attartortarnermut aningaasaliissutaasartut 2024 aallarnerfigalugu 50 %-inik annikilliniarmatigit ataatsimiititaliap ilanngullugu maluginiarpa. Ataatsimiititaliap paasinninera naapertorlugu, tamanna piumaarpooq ilanniartut ineqarfissaasa nutaat naammassiortorneqarnerat atorneqalernerallu ilutigalugu. Naalakkersuisut naliliipput ilanniartunut inissianik nutaanik inaarsaanerit atuilernerillu ineqarfissanik avataaniit attartortarnermik pisariaqartitsineq annikinnerulersissagaa. Naalakkersuisut ilanniartunut inissianik pisariaqartitsineq malinnaaviga, aamma ilanniartut inissaat nutaat atorneqalerpata ingerlaannartussamik.

Inissanik innersuussisarneranut ineqartussanillu tulleriaarisarnermut atortinneqartussamik nutaamik nalunaarusiorneq Naalakkersuisut suli naammassisimanagu ilisimatitsinerat ataatsimiititaliap maluginiarpa, kisiannili suliassaq taanna aallartinneqarsimasoq. Ataatsimiititaliap ilisimatinneqarnissani, kingusinnerpaamik nalunaarutip atortuilersinnejarneranut atatillugu kissaatigaa. Naalakkersuisut tamanna tusaatissatut tiguaat isumagissallugulu nalunaarutip atortuilersinneranik ataatsimiititaliap ilisimatinneqarnissaa.

Taamatut oqaaseqarluta Naalakkersuisut siunnersuutip akuersissutigineqarnissaa siunnerfigalugu pingajussaaneerinissamut ingerlateqqinnejarnissaa inassutigissavaat.